



16. oktober - 2024

UKA2024/44

[Illulortiternermut aningaasalersuineq pillugu inatsisip allangortinnissaa pillugu Inatsisartut Inatsisaat]

(Tullerriiarinissamut uppersarsaaneq, sanaartortitsinermut naatsorsuutit, kaaviiartitsinissamut inerteqqut, piffissaq sioqqullugu taarsigassarsianik akiliineq il.il).

Siumumiit inatsisip allangortinnissaanut Naalakkersuisut siunnersuutaannut imatut oqaaseqaateqassuugut:

Siumumiit maluginiarparput inatsisip allannguutissaatut siunnersuut una ineqarnermut iluarsaaqqinnerup malitsigisaanik malitseqarluni inatsisinik ineqarnermut tunngasunik naleqqussaanagerusussaasoq, tassami ineqarnermut tunngasutigut aqqissuusseqqinnissami naleqqussaaniassat assigiinngitsut pinngitsoorneqarsinnaanngitsut pisussanngornerat avaqqunneqarsinnaanngitsutut isigigatsigu.

Inatsissami siunniunneqartoq Inissiat pisortanit taarsigassarsilluni pissarsiarineqarsimasut piginnittumik, imaluunniit attartortumit inoqutigiivinillu taamaallaat najugaqarnissap qulakkeerinniffiginissaa ersarissarneqarnera iluarisimaannarpoq, tassami qulakkeerinnittussaammat illumik piginnittup inoqutaasalu illumik najugaqartussaanageranik taamaasillunilu illup najornerani allatigut inuutissarsiornikkut najukkami suut inuutissarsiutitut annikinnerusumik namminersorluni ingerlanneqarsinnaasut ersarissarneqarnerat pillugu Siumumiit iluarisimaarinninnerput oqaatigissallutigu.

Aammattaaq inissiamik piginnittup nutaanik taarsigassarsinerani qularnaveeqqusiussilluni taarsigassarsititsinissamut periarfissiisoqarnera taamatullu ingerlaavartumik naleqqussaaniassamut pitsanngorsaasinnaaniassamullu periarfissamik sulii pitsanngortitsisoqasinnaanera takusinnaagatsigu iluarisimaarparput, tassami misilittakkat takutimassuk pingaartumik illup aserfallakkiartornerani periarfissat inatsimmi piulertussat eqqarsaatigalugit illumik piginnittumut ersarissaanermik periarfissatigullu atorineqarsinnaasunik qulaajaasoqarneranik ajunngitsumik siunertaqartutut isigigatsigu pitsannguutissatullu illuutilimmut sunniuteqartussaasoq takusinnaagatsigu iluarisimaanerinnilluta.

Kommunit inissiani pioreersuni iluarsaasinissanut, pitsanngorsaaniassanut, allilerinissanullu taarsigassarsiaritanik tunniussinissamut piginnaatitaalersussaanagerat siammasissumik sunniuteqassasoq takusinnaavarput, pingaartumik inoqarfinni minnerusuni nutarterinissamut siunertaq tulluuttoq oqaatigineqartoq maluginiarlugu iluarisimaarlutigu, ilutigitillugulu oqaatigissallugu taamatut siunniussaqaarnermi innuttaasut illuutilit



qaammarsaaffigineqarluarnissaat pisariaqarmat, tassa suli ullutsinni pingaartumik atuarniarnermik ajornartorsiuteqartut, aammalumi utoqqaanerusut eqqarsaatigalugit imaalitsiaannaq internetsikkut paasisassarsiorsinnaangimmata, tamakku eqqarsaatigineqarnissaat piumasaraarput ilanngulluni piutinneqassasoq.

Kiisalu pisortanit taarsigassarsiat naleerukkiartortut eqqarsaatigalugit, illuuteqartup pisinissamut siunniussinerata kinguneranik naatsorsueriaaseq atugassatut siunniunneqartoq tassaaasoq; Naatsorsueqqissaartarfiup qaammatinut aqqaneq marlunnut kingullernut akigititanut naleqqersuutaani allannguut kingulleq naatsorsugaq 1 procentimik ilallugu siunissami aallaavigineqartalernissaa pillugu ilaatigut tusarniaanermi uparuarneqarsimanera pillugu ilaatigut ataatsimiititaliami sammineqarsinnaanera Siumumiit ammaffigalutigu oqaatigissuarput.

Siumumiit inissaqarniarneq taamatuttaaq initaarnissamut periarfissat naleqqussartuarnissaat anguniakkatsinnut ilaalluinnartut naggataagut erseqqissaatigissuarput, tassami inuiaqatigiit sapinngisamik ineqarnikkut pitsaasumik avatangiiseqarnissaat, minnerunngitsumillu ineqartut periarfissaasa inatsisitigut naapertuuttumik iluarsiivigineqartuarnissaat aqutissatut tulluurtut ingerlaffigineqartuarnissaat tunngaviatigut piusussatut isigilluinnarparput.

Taamaasilluni ineqarnerup pilerinartuunissaa, ineqartullu inigisaminnut nutarterisinnaanerisa piujuartinneqarnissaat, aammalumi ineqartut inigisaminnut pisiarerusussuseqartuarnissaat piusussaasutut isigilluinnarlutigu.

Taamatut oqaaseqarluta inatsisissatut siunnersuut taperserlutigu Ineqarnermut ataatsimiititaliamut suliarilluarneqarnissaa kissaatigalutigu ingerlateqqipparput.

Jens Kristian Therkelsen Siumut